

08 JUL 2003

Multaqa-Persiapan (Bergambar)

VENUE MULTAQQA MULA SIBUK DENGAN KEHADIRAN PESERTA

PUTRAJAYA, 8 Julai (Bernama) -- Hotel Marriott Putrajaya di sini, venue Multaqa Ulama Sedunia, mulai sibuk dengan sebahagian peserta mendaftar diri bagi persidangan tiga hari itu yang bermula Khamis ini.

Beberapa pegawai dan kakitangan Jabatan Perdana Menteri (JPM), penganjur multaqqa itu, menguruskan pendaftaran para peserta dan pembentang kertas kerja di kaunter pendaftaran di lobi hotel itu.

Antara peserta yang telah mendaftar ialah dari Indonesia, India, Lubnan, Jordan, Syria, Oman, Maghribi, Emiriah Arab Bersatu (UAE) dan Amerika Syarikat.

Kira-kira 900 peserta termasuk 90 dari luar negara terdiri daripada ulama, cendekiawan dan ahli pemikir Islam dijangka menghadiri persidangan itu yang akan membincangkan cabaran-cabaran yang dihadapi umat Islam dalam era globalisasi.

Sebanyak 22 kertas kerja yang meliputi isu-isu agama, politik, sosial, ekonomi dan pembangunan akan dibentangkan sepanjang persidangan itu, yang akan dirasmikan Perdana Menteri Datuk Seri Dr Mahathir Mohamad.

Suasana juga kelihatan sibuk di Bilik Sekretariat JPM dan Bilik Sekretariat Media yang dikendalikan Pertubuhan Berita Nasional Malaysia (BERNAMA) selaku media rasmi multaqqa itu.

Pengerusi Jawatankuasa Induk multaqqa itu Tan Sri Abdul Hamid Othman juga meluangkan masa untuk melawat persiapan hari ini.

Beliau mengambil masa kira-kira sejam untuk meninjau tempat pendaftaran peserta, Sekretariat JPM, Sekretariat Media, pusat media dan bilik untuk persidangan berita.

Abdul Hamid, yang juga Penasihat Agama kepada Perdana Menteri, berpuas hati dengan persediaan yang dijalankan bagi persidangan itu.

Kira-kira 30 peratus daripada peserta luar negara sudah pun tiba untuk menghadirinya, kata beliau kepada Bernama di sini.

Antara ulama terkemuka yang akan menghadiri multaqqa itu ialah Imam Besar Sheikh Al-Azhar dari Mesir Dr Sayyid Muhammad Tantawi yang akan menyampaikan ucpatama bertajuk "Beragama Yang Sebenar Dalam Era Globalisasi", katanya.

Abdul Hamid berkata ucapan perasmian Dr Mahathir akan disiarkan secara langsung oleh Radio dan Televisyen Malaysia.

-- BERNAMA

HM AZZ NAK